



CONVENIO DE COLABORACIÓN ENTRE A CONSELLERÍA DE EDUCACIÓN, UNIVERSIDADE E FORMACIÓN PROFESIONAL E A UNIVERSIDADE DE SANTIAGO DE COMPOSTELA PARA O IMPULSO DO BACHARELATO DE EXCELENCIA STEM (STEMbach) NO MARCO DA ESTRATEXIA GALEGA DE EDUCACIÓN DIXITAL 2020 (EDUDIXITAL 2020).

Santiago de Compostela, 14 de febreiro de 2019

REUNIDOS

Dunha parte, D.^a Carmen Pomar Tojo, conselleira de Educación, Universidade e Formación Profesional (en diante, a Consellería), que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 96/2018, do 26 de setembro, e no das atribucións que lle confire o Decreto 4/2013, do 10 de xaneiro, polo que se establece a estrutura orgánica da Consellería.

Doutra, D. Antonio López Díaz, reitor magnífico da Universidade de Santiago de Compostela (en diante, USC), que actúa en nome e representación dela en virtude do Decreto 57/2018, do 31 de maio (DOG do 5 de xuño de 2018), do seu nomeamento, e polas facultades conferidas pola Lei orgánica 6/2001, do 21 de decembro, de universidades, modificada pola Lei orgánica 4/2007, do 12 de abril, e polo Decreto 14/2014, do 30 de xaneiro, polo que se aproban os estatutos da USC.

As partes recoñécense reciprocamente, no carácter con que interveñen, plena capacidade xurídica para a sinatura deste convenio e, para tal efecto,

EXPOÑEN

I. Que o Estatuto de Autonomía de Galicia, na redacción dada pola Lei orgánica 1/1981, do 6 de abril, no seu artigo 31 atribúelle á Comunidade Autónoma de Galicia a competencia plena da regulación e administración do ensino en toda a súa extensión, niveis e graos, modalidades e especialidades.

Ademais, mediante o Real decreto 1763/1982, traspásanse á Comunidade Autónoma de Galicia as funcións e servizos da Administración do Estado en materia de ensino non universitario.





II. No ámbito da Administración autonómica de Galicia, a Consellería é o departamento que ten atribuídas, entre outras, as competencias e funcións en materia de xestión dos centros de ensino público de educación secundaria situados na Comunidade Autónoma de Galicia.

III. A Consellería está a desenvolver a Estratexia Galega para a Educación Dixital (en diante, EDUDixital 2020) que conta, entre os seu obxectivos e accións, con diversas actuacións encamiñadas ao fomento do coñecemento e as vocacións en Ciencias, Tecnoloxía, Enxeñería e Matemáticas (en diante, STEM).

IV. No marco de EDUDixital 2020 recóllese como un eixo fundamental fortalecer a colaboración das entidades e institucións relevantes no fomento das vocacións das ámbito STEM, especialmente entre as nenas e rapazas, de xeito que se rompa coa actual fenda de xénero neste ámbito.

V. Entre os programas en desenvolvemento de EDUDixital 2020, un dos máis relevantes e a iniciativa de implantación do “Bacharelato de excelencia en Ciencias e Tecnoloxía (STEMbach)”, regulado, de xeito experimental, para o curso 2018/19 pola Resolución do 12 de xuño de 2018, da Dirección Xeral de Educación, Formación Profesional e Innovación Educativa.

Este bacharelato está dirixido ao alumnado e aos centros que teñan interese en afondar en temáticas vinculadas co ámbito STEM, mediante os diferentes métodos de investigación e de análise dos problemas propios de calquera investigación. Neste sentido, inclúe a realización dun traballo de investigación que deberá ser codirixido, de acordo co previsto no apartado sexto desta resolución, por unha persoa docente pertencente a un departamento universitario ou entidade de investigación. Este traballo será obxecto de defensa pública ante un tribunal do que formará parte unha persoa da entidade de investigación ou departamento universitario colaborador no proxecto, diferente da persoa que codirixe o traballo.

VI. Que é de interese para as dúas institucións colaborar para que o alumnado do STEMbach dos centros dependentes da Consellería teñan facilidades para a realización e defensa dos traballos de investigación que deben realizar co máximo rigor e calidade posible.

Consecuentemente con todo o indicado, a Consellería e a USC manifestan a súa vontade de asinar un convenio de colaboración para a realización das indicadas actividades, de acordo coas seguintes

CLÁUSULAS



Primeira. Obxecto

Este convenio ten por obxecto a colaboración da USC nas diversas accións previstas na Estratexia EDUdixital 2020, nomeadamente a cotitorización de alumnado de STEMbach no marco do traballo de investigación que deben realizar e defender no segundo ano da súa formación.

Segunda. Obrigas da USC

Mediante a sinatura deste convenio, a USC comprométese a realizar a seguinte actuación:

- Facilitar á consellería competente en materia de educación, anualmente e con anterioridade ao inicio das actividades lectivas do alumnado, a relación dos departamentos e profesorado universitario que colaborará no desenvolvemento das actividades de EDUdixital 2020 e, concretamente, na cotitorización do traballo de investigación en STEMbach.
- Facilitar o desenvolvemento das actividades de investigación do alumnado de STEMbach, de ser o caso, nas súas dependencias e coa debida supervisión do persoal da USC e do seu centro educativo.
- Propoñer e impulsar proxectos conxuntos de investigación e innovación entre a USC e os centros educativos dependentes da Consellería.
- Colaborar na realización de cursos de formación permanente do profesorado da Rede de Formación do Profesorado da Consellería ou no marco do convenio vixente en materia de formación permanente do profesorado coa USC.
- Realizar unha avaliación do desenvolvemento das actividades asociadas a EDUdixital 2020 nas que colaborasen.
- Respetar a obriga imposta polo artigo 13.5 da Lei orgánica 1/1996, do 15 de xaneiro, de protección xurídica do menor (LOPXM), introducido pola Lei 26/2015, do 28 de xullo, de modificación do sistema de protección á infancia e á adolescencia, no sentido de que o persoal da USC non fose condenado por sentenza firme por delito ningún contra a liberdade e indemnidade sexual.

Terceira. Obrigas da Consellería

Pola súa parte, a Consellería comprométese a realizar as seguintes actuacións:

- Facilitarlle á USC a información necesaria para o axeitado desenvolvemento das actividades



mencionadas.

- Velar para que o alumnado dependente dos seus centros respecte escrupulosamente toda a normativa interna da USC.
- Propoñer e impulsar proxectos conxuntos de investigación e innovación entre a USC e os centros educativos dependentes desta consellería.
- Facilitar a participación do profesorado e persoal investigador que colabora coas accións vinculadas a EDUdixital 2020, en especial naquelas que teñan que ver coa divulgación, comunicación social e formación do profesorado.
- Realizar unha avaliación do desenvolvemento das actividades asociadas a EDUdixital 2020 realizadas conxuntamente coa USC.

Cuarta. Beneficios

Mediante a sinatura deste convenio, as partes comprométense a facilitar ao persoal docente universitario e non universitario que realice a cotitoría do traballo de investigación asociado a STEMBach os seguintes beneficios:

a) Para o profesorado non universitario que participe neste programa:

- Certificado de innovación educativa ao remate de cada curso escolar, cunha equivalencia de 50 horas de formación permanente do profesorado para a persoa coordinadora e para o profesorado titor, supeditada á avaliación positiva do desenvolvemento do programa realizada pola comisión de valoración.

b) Para o profesorado universitario titor do traballo de investigación:

- O recoñecemento do seu labor docente no STEMBach para efectos de valoración no complemento retributivo de recoñecemento á excelencia curricular docente e investigadora como actividade de formación tutelada oficialmente recoñecida.
- O recoñecemento do seu labor docente no STEMBach para efectos de valoración en DOCENTIA como actividade de formación tutelada oficialmente recoñecida.

c) Para o profesorado universitario que conforme os tribunais do traballo de investigación:





- O recoñecemento do seu labor docente no STEMbach para efectos de valoración no complemento retributivo de recoñecemento á excelencia curricular docente e investigadora.
- O recoñecemento do seu labor docente no STEMbach para efectos de valoración en DOCENTIA.

Quinta. Rexistro de convenios

A sinatura deste convenio suporá o consentimento expreso da USC á Consellería para incluír e facer públicos os datos referidos ao convenio, de conformidade coa Lei 1/2016, do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o rexistro de convenios da Xunta de Galicia.

Sexta. Vixencia

Este convenio entrará en vigor o día seguinte da súa sinatura, estará vixente no curso escolar 2018/19 e poderá ser prorrogado automaticamente por cursos escolares sucesivos, cos límites establecidos no artigo 49 h) da Lei 40/2015, do 1 de outubro, de réxime xurídico do sector público, salvo denuncia expresa dunha das partes asinantes cunha notificación á outra con dous meses de antelación.

Sétima. Comisión de coordinación, seguimento e avaliación

Coa finalidade de asegurar o cumprimento deste convenio, crearase unha comisión de coordinación, seguimento e avaliación composta por dous/dúas representantes de cada unha das partes asinantes, presidida polo director xeral Educación, Formación Profesional e Innovación Educativa, ou persoa en quen delegue.

As funcións da comisión serán as seguintes:

- Velar conxuntamente polo correcto funcionamento das actuacións obxecto deste convenio.
- A avaliación das actuacións, unha vez finalizadas.
- Resolución das discrepancias en orde á interpretación do convenio.
- Adoptar as medidas necesarias para a coordinación das actividades preventivas dos profesionais dunha parte que desenvolven as actividades na outra parte.





- A redacción dos documentos que as partes deberán asinar en relación coa protección de datos de carácter persoal.
- O réxime de propiedade intelectual dos traballos conxuntos.

O réxime xurídico desta comisión será o establecido na Lei 40/2015, do 1 de outubro, de réxime xurídico do sector público, para os órganos colexiados.

Oitava. Causas de resolución

Este convenio resolverase polas seguintes causas:

- a) Por incumprimento total ou parcial dalgún dos seus puntos.
- b) Polo transcurso do tempo estipulado sen que se culminen as actuacións acordadas.

Esta resolución do convenio non poderá afectar ás actividades iniciadas pendentes de execución, así como ás persoas beneficiarias efectivas polas actividades xa executadas.

Novena. Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas cláusulas, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público pola Resolución da Consellería de Economía e Facenda, do 8 de abril de 1991.

Aínda que é un dos excluídos do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, segundo especifica o seu artigo 4, ao non previsto aplicaráselle os principios recollidos na citada lei, co fin de resolver as dúbidas e omisións que puidesen presentarse.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Ao estaren as dúas partes conformes co estipulado, asinan catro copias do convenio.





XUNTA DE GALICIA

CONSELLERÍA DE EDUCACIÓN, UNIVERSIDADE
E FORMACIÓN PROFESIONAL

Edificio Administrativo
San Caetano, s/n
15781 Santiago de Compostela
www.edu.xunta.es



A conselleira de Educación, Universidade e Formación Profesional	O reitor da Universidade de Santiago de Compostela
Carmen Pomar Tojo	Antonio López Díaz



Xacobeo 2021